

NGF fetg problematica per la Surselva

■ Il project da votaziun davart la NGF dils 7 da mars 2010 ei fetg dispoteivels. En special vegn criticau che la scola populara ed ils fatgs socials duein vegnir adossai per gronda part allas vischnauncas. Las consequenzas per las vischnauncas dalla Surselva ein in bien ton pli grevas sch'ins cumpareglia cun igl entir Grischun. Rodund duas tiarzas dallas vischnauncas sursilvanas ston quintar da stuer surprendre dapli incumbensas entras la NGF. Persunas dil fatg dils secturs da scola e dil socialesses informeschan ils 15 da fevrer 2010 a Glion e stattan a disposiziun per damondas dalla populaziun. La NGF pertucca biaras incumbensas staltas, la plipart denton incaricas sil sectur dalla scola e dil socialesses. Tenor la NGF duein el futur cunzun las vischnauncas esser responsablas per incumbensas ord quels secturs. Ils mieds finanzials vegnan mess a disposiziun senza determinaziun d'intent. Quei meina inevitablamein a differenzas da qualitat e da prestaziun.

La NGF Grischuna ei buc adattada per la Surselva

Pli che 60% dallas vischnauncas dalla regiun Surselva han pli pauc che 500 habitonts e mo treis vischnauncas dumbran dapli che 2000 persunas. Il concept, sil qual da NGF sebase, va perencunter da quei anora che tut las vischnauncas grischunas ein menadas a moda efficienta e professiunala. Quei corrispunda denton claramein buc alla realitad cun las structuradas dallas vischnauncas actualas. La regenza grischuna constatescha sezza quei fatg en siu messadi (p. 1047): «Punct da partenza per la



Patrik Degiacomi dil comite encunterr la NGF.

FOTO N. SIMMEN

NGF ein ils suandonts fatgs: Structuras da vischnauncas disfavoreivlas cun vischnauncas grondas e da differenta grondezia, ed in grond diember da vischnauncas fetg pintgas.» La NGF sebase sin ina visiun, dalla quala il Grischun e la regiun Surselva ein pil mument lunsch naven.

Quella situaziun da partenza cun vi-

schnauncas efficientas e professiunalas ei facticamein buc avon maun ed ha aschia in effect fatal sin gl'entir project da votaziun. Ei vegn mess a dies incaricas allas vischnauncas che mettan ellas sut pressiu, seigi quei perquei ch'ellas han buca las finanzas necessarias ni muort munconza da persunal dil fatg che savess agir. Las vi-

schnauncas vegnan a stuer adattar lur purschidas allas pusseivladads finanzialas. Quei vegn ad haver consequenzas per la populaziun da regiuns cun fleivlas finanzas e tucca aschia oravontut las famiglias.

La Surselva piarda il pli bia cun la NGF!

Oravontut las vischnauncas dalla Surselva vegnan sut squetsch cun la NGF. Tenor las pli novas quintaziuns dil cantun stuessen duas tiarzas, pia 27 da 40 vischnauncas, quintar cun pli paucs mieds finanzials dil cantun. Quei malgrad che la NGF adossescha ad ellas incaricas novas e complexas. 16 da quellas vischnauncas retscheivan leutier in bionton pli paucs mieds ord l'utilizaziun da finanzas pil socialesses. Quei munta che las vischnauncas ston vegnir a frida per gronda part persulas cun lur incumbensas socialas. Il pli fetg tucca ei gest la vischnaunca cun la pli gronda populaziun dalla Surselva: Flem. La vischnaunca da Flem stuess supportar ina sperdita da 100 000 francs e stuess aunc purtar sezza tut ils cuosts dil socialesses.

Il comite discutescha ils 15 da fevrer a Glion cun la populaziun

Dil comite «NA alla NGF» fan quasi tut las organizaziuns dil sectur da scola e dil socialesses part: Organizaziuns dil fatg relevantas, mo era organizaziuns professiunalas e da glied pertuccada. Las persunas dil fatg, officials, persunas dalla pratica e pertuccai ein dil meini ch'ils effects da quei pachet seigien gravions per la populaziun grischuna e cunzun per la Surselva.

Il comite informescha a caschun d'ina

discussiun publica ils 15 da fevrer 2010 allas 20.00 el restaurant Rheinkrone a Glion davart ils effects dalla NGF grischuna.

Dalla discussiun fan part: *Martin MATHIET* (cau dil Departament da formaziun Regiun Surselva); *Elisabeth LOREZ* (comembra dalla suprastanza dall'Associaziun dils cusseglis da scola GR, presidenta dil cussegl dalla Scola superiura Lumnezia); *Patrik DEGIACOMI* (president dall'associaziun professiunala AvenirSocial GR, menader dil post da cussegliazion Pro Infirmis Surselva).

Patrik Degiacomi

Il comite «NA alla NGF» metta a disposiziun informaziuns en tut ils treis lungatgs dil Grischun sin www.buendner-nfa.ch, www.ngf-grischuna.ch ni www.npc-grigionese.ch.

Vischnauncas che piardan cun la NGF

Breil/Brigels, Cumbel*, Degen*, Duvin*, Falera, Flem*, Laax, Luven*, Morissen*, Mundaun*, Pigniu, Pitasch*, Rueun, Rueschein*, Saftien, Schluein*, Schnaus, Sevgein*, S. Martin, Tenna, Trun*, Valendau*, Vella*, Versomi*, Vignogn*, Vrin, Waltenburg/Vuorz

* Vischnauncas che retscheivan suenter era claramein pli pauc ord l'ulivaziun da finanzas pil socialesses.

reclama

Il mandat da pensiun da la BCG.

La soluziun d'investiziun optimala per persunas pensiunadas.

Per segirezza e flexibilitad cun ina rendita maximala.

En la fasa da pensiun èsi particularmain impurtant da segirar las entradas e d'investir la facultad a moda optimala. Il nov mandat da pensiun da la BCG As offra soluziuns d'investiziun individualas cun in'auta segirezza ed ina rendita attractiva. Ans contactai per ina cussegliazion persunala, tel. 081 256 88 56.

www.gkb.ch/pensions-mandat

Crescher cuminaivlamain.



Banca Chantunala Grischuna

DIARI D'INA EXPEDIZIUN EN NEPAL 8

Muri-Boghara

Ils 19 d'avrel 2009

Il tschancun ded oz ei liungs e stentus. Igl emprem eis ei puspei de descender ualti teis tochen tier il flum e lu ditg alla liunga dil flum Myagdi Khola ensivars. Ei dat adina puspei pausas. Per ordinari sefermein nus sper in bein puril. Nus gentein en in liug idillic tier ina famiglia da purs e gudin ina buna accoglientscha. Els gudognan zatgei pauc cun vender gervosa e Coca Cola. Suenter gentar va ei teis ensivars tochen sin 2300 m s. m., lu puspei teis engiu ed era empau exponiu. Per certs cumpogns eis ei difficultus. Jeu hai cumpassiun cun ils purtaders. Co vegnan ei a frida en lur flip-flops cun las grevas cargas? Disada dad ir per ils cuolms sai jeu cuntinuar in toc tut persula.

Sin in crest vesein nus lunsch giuado nies camp. Las tendas ein gia pustadas e prontas da vegnir occupadas. Sper nies camp sesanflan tendas blauas cun l'inscripziun «Sulamit». Ina expediziun da nov persunas che vulan ascender il Dhaulagiri. Els vulan arrivar enteifer siat jarnas sil spitg da quei pèz sin 8167 m s. m. Jeu sun plein marveglias e teidlet attenti-

vamein las explicaziuns d'in um e d'ina dunna sur da lur preparativas e l'execuziun da lur trekking. Ei dattan a mi lur adressa d'internet e cura che jeu sundel a casa sai jeu lu mirar co ei va cun els.

Nossa gruppa vegn adina pli cumpacta. Ils umens che havevan all'entschatta dubis schebein jeu seigi sin la tscherca d'in um ein tuttenina fetg honzelis e segidan sch'ei fa basegns. Uwe raqueta mintga sera duront nies «tea time» zatgei sur dalla historia da Nepal. Il pli savens sundel jeu denton fetg stauncla ed audel buca tut – donn. Suenter tscheina prendel jeu per ordinari sco emprema cumiau dalla gruppa e sundel entuorn las ota e mesa en mia tenda. Co sun jeu leda da haver ina tenda mo per me! Jeu audel bunamein plaid per plaid tgei che mes vischins Norbert e Daniel han aunc da discussiunar. Ils affons dil vitg vegnan naturalmei era sperasvi. Els ein propi paupers e tschufs. Pli ad ault che nus vegnin e pli paupra e tschuffa ei la glied. Ed era questa notg dat ei tgauns che vagabundeschan entuorn e fan in giappem.

Rosalie Jörg-Beeli
Cuntinuaziun suonda!



In da nos novs camps cun ina biala survesta sin ils aults cuolms da neiv ch'ei aunc fetg allontani.

MAD